



VBbo magni nominis miles apud Frisios natus & educatus fuit. Is socijs alijs assumptis luttiae fines crebra popularium strage vastavit, & magnam sibi auctoritatem cōparavit. Huic Haraldus Daniæ rex cum exercitu obviam progressus est. Verum cum armis ipsum vulnerare nō posset, milites ad eum manibus capiendum hortatus est. qui eum tandem humi prostratum uinctum regi attulerunt. Itaque rex eius fortitudinem admiratus eum socium asciuit, atque suam sororem ei in matrimonium collocavit, anno 430. Inde tanti militis opera usus Frisios domuit, & arma sua ad Rhenū usque protulit. Cum autem tandem Haraldus senex contra Ringonem

Sueonū regem arma mouisset, atque uictus esset, etiam Vbbo fortiter pugnando occubuit. Verum antequam ipse caderet uiginti quinque delectorum pugilum interfecit, & undecim in acie uulneravit. Itaque Sueones cominus cum eo congregari ueriti, spiculis eum procul confecerunt. Testatur Saxo Historicus quod is centum quadraginta quatuor sagittas aduerso corpore prius accepit, quam lapsis corporis uiribus solo poplite daret. Sax, Gram. Hist. Dan. li. 8,